

四庫全書

子部

欽定四庫全書

翰苑新書別集卷六

劄子

代回何侍郎

方秋崖

某伏以綠陰清美雲助麥寒恭惟某官戟衛靖嚴民以
嘉賴上帝宥密台候動止萬福某謹墨筆以黷燕凝之
暇

某觀頤之象乃知一身之間自有宇宙燮調妙用蓋與

造化者同功約而歸之則不出於鼎鼐外某敢願戲下
少留之意

某惟經濟之學堯舜吾君密勿論思不當一日去上旁
近也常為郡雖離天纔尺五抑何至騎麒麟翳鳳凰而
辱臨之寸懷春風物物生意東西行者誦袴襦之謠相
踵某敢寄聲為父老賀

某每謂皇上厲精如漢宣帝而嘉與諸儒論天下事左
臯右契紳佩斤斤萬玉之班蓋已極一世之選孰有畫

治安策如賈太傅而久外者耶宣室竚思聞已趣四輩
召矣時事孔棘願為上痛哭流涕太息而言之海內其
受賜

某冉冉將老而縈帟之憂絲棼顧瞻江山有慨其歎綠
波黯別曾歲月之幾何鼓角相聞僅隔此一衣帶水然
赤白囊羽相及一書亦未暇也戲下不督過之而相問
勞如此某敢歌伐木之詩以拜

某四年淮閬艤技已窮敵為封豕長蛇荐食上國天不

金之八八八
卷六
悔禍岌岌然自危之丐骸之章凡幾上而幾卻矣同舟
遇風之時中流一壺之賜某不无望

某伏想蓬翠之集佩明月者天人也某不敢問起居狀
而請事於將命者

代回王都丞

方秋崖

某伏以梧風已秋碧宙如洗恭惟某官銀菟有偉偃護
龍潛天棊靖共台候動止萬福某謹寄聲為南州父老
賀

某惟寶婺之秀揚光斗牛薦生儒英棟幹吾國敢願采
明堂月令以燮調一身之陰陽山川百示予曰有先後
某自庶車使江上嘗得屬橐鞬具鞞袴以迎候于風濤
浩渺之間不自意一世偉人乃能相與握手出肺肝以
共談天下事憂國之淚衣襟尚寒

某時則目送歸艎倒指奏事榻前之日想像上問江防
利病使者聚米為山谷處應答如響天顏喜動將以安
危二柄付之不謂事乃有大謬不然也抑古語有去不

難无以見君子

某試嘗謂武夷當天勝絕處而西山老子之闕里也都丞以衣鉢的傳擁麾其鄉孰瞻孰儀有像在堂然則以詩書澤斯民者盖老先生之枌榆而賢刺史之甘棠乎幸少安之天子有詔

某鼠技窮矣无以分上顧憂於皇綵綸班我端殿亦安知先翁十年邊瑣盖身後始得之豈其不肖之孤克邁前人之寵異櫝行得請敬避賀言之三舍

某伏想戟衛飛瓊之佩郁穆仙壺踈遜者不敢僭起居而惟請所條委者

代回蔡總鄉

方秋崖

某伏以春襲仲陽雨寒猶峭恭惟某官總司輿賦宏濟中興神扈輯諧台候動止曼福某謹三肅以拜將命者之辱某試嘗倚平山欄檻望治城在煙雨有无之間未嘗不喟然歎曰長江天塹有管夷吾在焉山君海王其必為吾國寶之某是以有節宣鼎食之請

其惟宋有天下三百餘年於此矣聖聖相授共守一仁
雨恬春熙乃有孽芽其間者敵負戎馬足併吞窮荒封
豕无厭荐食上國遭時多事至以饋餉勞吾儒宗然中
郎禮樂之家名父文章之印使之從容帝所謨明弼諧
蠡彼裔夷必將相戒以毋生事開邊隙而奚南牧之敢
某日望之

某聞李牧之守鴈門匈奴不近趙邊者十數年蓋老熊
當道之勢如此今茲誰實顯閫而淮流上下草木震驚

西援肥河所謂奉漏甕沃焦釜不足以喻其急敵騎宵遁亦將士之勞耳書何力之有焉忽奉詔函授以大司寇印綬再上免牘期必得請而後已有來慶問其避之三舍

某限此一衣帶水鴈雲杳茫江山愁予慨其歎矣顧今人物寥落思濟艱難者能幾人舉眼而視八荒願承下風以請曷日佳晤顧所懷

某維縹緲樓居者天人也香深翠水九霞飄蕭燕及崑

金文四庫卷六
臺同一禔福

某邈在邊鄙何當敬奉使令鞭弭以須敢告執御

回趙寺丞

方秋崖

某伏以麥之秋矣風日清妍恭惟建牙于藩宣布寬大
天人闡懌台候動止萬福某滌筆滄浪之水挹蘿月而
寫之惟清

某私切惟念郡刺史佩二千石印綬綏寧一邦而某也
帶笈簪於鷗邊臥襪襖於牛下則野人也奚其茵憑之

敢問

某屏廢林壑且十稔於當世士大夫遙遙乎蓬萊之隔
弱水也然碧宙寥泝月明在天林密山深亦被光景某
蓋嘗瀉浩露而褰長風矣

某惟執事先生家有周公之履舄廟有山甫之鼎彝其
氣吞餘子而蓋當世也退然素士方且與枯槁為春風
以幽隱作皓月此其尺度未易量也是以有袞衣兮无
我公歸兮某未敢以誦者邦人之私耳

某窮老不學所謂悻直而无涵養之功徑率而无矯揉之力岩居穴處化為猿獠政坐鬼擘口耳天所以與我者如此恬然安之山北山南掛書牛角而讀某與受其賜

某舊常學泯事大夫之禮矣遣一介之使奉咫尺之書迎候前驅唯所進退者此其常也乃今負罪引慝潛幽而伏深固不得與薦紳比率然以名聞恐執訊者之斥其黷則林慙无盡而澗媿不歇也某如之何而可

某日與芸夫羗子安樂耕桑切聞寬之一分折券而捐
之者動為緡錢數十百萬相與贊歎誦言愛民抑不知
其能下士又如此也何物小子鄙在山林不吾書而吾
先之非自學問中來不我怒亦不我屈矣某拜手書諸
紳

回馮提刑

方秋崖

某維春以雨露農事未競恭惟某官以書平準民所宅
生篤滌斯皇台候連止萬福某謹拜手修名于典史氏

某聞康廬天下勝處生其間則高者為隱逸又高者為神仙不得獨當奇也必有提一筆福蒼生者譚然出此山中咨爾山靈其敬乃職

某維天方祚宋所以眷命用懋者政在屢豐年一詩耳故雖百脉皆病元氣猶存此執事者高枕而卧也乃歲比不入民方采西山之薇嵐翠軒憲豈公獨樂時耶鮮于福星為爾一出自江以西某何幸

某嘗切有歎謂何蕃為六館諸生時聲名已獵獵北斗

南矣一經科目卧餘子百尺樓下使騎麒麟翳鳳凰而
上顧獨不得與上界官府等伍耶時來則為之寧不我
與

某兒時學于里之東臯識厚齋癯然山澤之儒也壯歲
仕于淮浙之東西識二季軒然湖海之豪也於名門獨
不見最良白眉耳假守來此則已揭節而西尚徼福賢
父子令兄弟間惠然教我

某與世少可所至賦歸去來始裴晉公督九節度之師

擇廷臣自從而某在其選莫之可以雅意本朝也至然後請置散造化者不得已出麾鄭公之鄉歲月幾何不自意及惟愛其桑梓以施及其謬守某知免夫

某惟霄漢之臺冰玉之御非踈賤者所得問起居何如也若此山之左花右竹則護眎无敢不謹

回南康太守游寺丞

趙松壑

淮東總領使

某伏以朱衡云杪紅鏡開炎恭惟某官雙旌有華五袴流詠閎昭顯相台候動止萬福某謹濡子墨祇復主籤

首幾紆省

某如左之儀飭矣載惟良二千石福十萬家福之所基
欽於身者可知矣調冰紵綌之請敢得以畧

某耳飲霆聲不知幾冰暑未酬輕封萬戶之願斗山仰
止實勞我心巧緣有開竭來餉道獲締寅盟遡風不覺
屐齒之折

某仰惟某官人物粹絜玉壺冰清履行孤高錦亭栢古
蚤以正學敎于明時振武鵷鷺行久締冕旒非常之眷

績凝棘路榮剖竹符地重瑞陽式弘蕃宣之畧簡靜平
易鑄頑成仁革珥筆之澆風樂耕耒之常業山谷所賦
今親見之佇膺璽札之褒入繼索班之武

某處奉珎祠正便茗溪盟鷗之趣誤思下逮畀以東道
饒事之重控辭弗獲冒為是來司存亦立事事築底凜
然未知所以為淑後之方惟冀軫念同舟共圖叶濟鄙
免曠戾徼福孔多馮褚宣心矜體是幸

某方圖染記以露謝忱儷玉駢珠首厯委况拓焚控酢

厓約一莞為榮

某皇恐申問黃堂羣玉之輯伏計一和所召百祿是道
赤柳翫需供俟攸曉

回游太守

趙崇潔

編修

某伏以秧疇足雨荷屋陰風恭惟某官森戟凝香十同
自化三極炳扶台候動止萬福某九頓此首戴籤房之
敬肅丐訾省

某聞之司牧民者吹之煦之拊手摩之不專為一身計

也區區饗寢之祝故得以畧

某疇昨深耕枯嶺幸甚獲與白傳草堂賓客之數甘棠
勿翦至今與里中兒和習之蓋十年猶一日也古之所
去見思者其謂是歟

某仰惟某官親接伊水一脉之傳兼備孔門四科之美
行鵷序鷺朝望歸然展驥馮能民庸藉甚江西道院暫
借汲重卧治之選所表為公卿有地節之故事在

某習閑成癖榮望已灰誤踏班行苻更玷葛容臺何地

宥府何曹以若人而居之其非據也甚矣厥有藥石之
誨願无金玉其音夙託塵氓必蒙矜念

某尺箋申共寅之謝禮也軟紅眯目遂墮因循璀璨雙
緘恍從天落情文謙縟若施之事大者然凜弗克當永
以為好斐兮占報不敵所蒙其何適非臯

某粵軼加拜申敬黃堂星聚翠閣雲深繇裏暨邊儲祥
匪祉是間委役无敢不恭

回南康將太守

饒左司

虎臣

某伏以夏至紀月異二迎薰恭惟某官畫戟更新條教
簡靖環境歡舞台候動止萬福某輒馳尺書為兩州之
民折衷歸留之請

某惟五馬所次百神洋洋易地皆然无往不利饗綵謬
敬可畧

某恭審自天易鎮諏日臨民兩賢交馳千里胥慶仰惟
某官早出惠利夙綵講聞其應物也如止水之無心其布
政也如陽春之有脚擬看三峯之秀却從五老之游其

在康廬號江東神仙之郡則近道矣蓋河南高第之家
足光前修聳觀後効

某烏帽黃塵辰入酉出聞有書函自浮嵐暖翠中來者
亟拜亟讀謙光爛垂六儷聯珠何為至我細繹不稱捲
錦以歸

某力已竭伎已窮但欲從君問青雲白石之趣既非強
助唯唯奚裨行復引籲天之疏

某伏想金芙蓉觀中煙霧忽鬱亭亭玉立香遠益清不

成亦福

某恐有委于修門豈无白鶴飛來之便

回判府游南康

方秋崖

某伏以菊將秋老鴈帶寒歸恭惟某官風熙雨濡潤澤
千里神比天同台候動止萬福某薰被素書以復將命
者惟中涓史所裁

某聞參同一書子朱子嘗加之意造化有爐果身外事
乎身欽惠於一方福也輒歌魯侯千歲之詩以送之

某敬以某官丹山碧水之所儲與胸襟洒落益以風月再分之而後懷太守之章也近捨樵城遠易廬阜豈王淵三峽非有武夷曲二之清香不足與於此歟馬鬣一滴願亟霈之紫橐青氍將探手可復

某移郡而與鄭鄉為隣一幸也得替而有名家為代二幸也幸不及者交臂失之不能親做紫馬而已雖然未一月而兩薦名氏何幸如之

某技短才拙視英游非解先着一鞭取樵所棄竹馬姑

金匱要略卷六
卷六
曰塞上翁毋失可矣居前誚糠粃相倚媿兼葭每三復
歐公語則成山無一事可告

某平時則謂柳子非以拙對為巧也執事者耻之矣對
秋風之破屋而懷廣廈獨無杜陵之嘆歟眼前突兀恨
不身化為雲

某惟堂堂大姥森列乎雲階月地之間尊稭序列何福
不除至於羈勒所從尚以誨之鞭筴為寵

回隆興謝府教

方鐵庵

某冬行逾半陽欲離潛恭惟某官宏開絳帳絃誦洋然
靈脩相只台候動止萬福某劈一牋以酬先施伏祈鑒
在

某望斗牛間若有闕其光者宜非文星至而引避乎吉
耀實從靡祥不舍何以節宣彛禱為

某乙亥冬握手錢塘各携一遠坎歸計前日事而轉眄
七霜已墮夢境若倒指而推團司齒拜之集又夢之夢
也江鄉比肩機緣宜偶尋春隔面斷不其然

某恭審來司魯泮實主齊盟尊年丈文雄行粹少有大
學聲壯而兩仕非儒官不就其必有樂乎此府庠之外
又有湖堂然在府者曷嘗不談性命在湖者曷嘗不語
科舉會其歸而導其入師儒事也領袖成均教亦如是
請以今卜

某護漕篆至宜春留百五十五日側聆賀上之期不得
與諸客俱者勢也今與其長俱還矣迂踈拙僻無補幕
畫不復自言執事見之矣見而不以教且告僕將得以

有辭

某茲領誨汗有儼語焉若施之素昧者躊躇累日不敢
不併酬幸勿哂其拙

某端拜申問年家大眷恭惟福英祿華耆孺演迤既晉
會矣何敢請具文委

回黃機察

方烏山

某伏以清和之月新暑已祥恭惟某官政學夷猶華問
甚偉相維未只台候動止萬福某薰被柔訥仰復謙施

伏幾警省

某聞佳士勝流所至有碧紗籠擁護復雖居塵土中餐
沆瀣跨馮濛自若也茵鼎羹恭毋庸粒食煙火人語

某敬以某官名家之英士林之秀自當策足儲華超取
顯美袖手未試諸公愛之若琪璧然陪珠履之上游列
翹林之重客固其宜也一閱之市不幾委奇寶於道旁
乎然府公今代鉅人其所識察選擇當有意義得非欲
借玉雪以一洗湫隘之塵耶扶搖在望諒非淹此留也

某欽祝

某耳飫香名浩有歲月山川悠緬瞻際无從不圖一朝
得遂平生慕用之意執鞭為御固所願焉如之何而勿
喜

某兀兀窮年斲精神於螢窻雪案問其所得者皆虛名
而不切於實用以格分教市井屠沽之輩皆足以得之
政爾偶然不足貴也惟是觸熱一來得與公等完交論
丈何異濯清風而沃冷泉寂寞中獨賴有此耳良朝暇

日不鄙過從忘形到爾汝相與同襟期少陵鄭老不得
專此樂矣願望願望

某行役及境方聞執事太守游子茲揆分不敢以姓名
自通先施墮前不敏愧罪涉筆以謝略其文而取其意
足矣

某僭易端拜申問隨軒珪眷伏惟由堂徂序均介休祺
閑廳有可備委令者敢請

回本司呂運管

方熾庵

某伏以軫之方中冰霜稿野恭惟某露板首塗先聲數
鬯江靈奔攝台候動止萬福某三薰九頓晉記于主書
者伏祈錫擊

某觀養生之經多矣而揆時韵序則自呂令出宜採當
蒙之說順陽氣之生充其身之和散為一道之和某也
贊而不禱

某恭審天綍中頒星輶上介贊百萬計之婉畫沸十一
城之歡聲仰惟某官材名當世少雙閥閱中朝第一與

國終始者幾相倡道東南非一人丕揚賢聲綽有偉績
合階而上尚迂此行謂西江觀風之王人乃吾家麗澤
之高第將見賓主談笑之頃少行師友疇昔之言盡展
宏施要湏顯擢

某少之日知有兩申公家世矣稍知讀書惟太史是朝
是夕近遊江鄉又知筠有大愚叟一段話今又得其玉
委如執事者非惟既見之將日趨走其旁觀瞻典刑叩
請源委大喜過望

其一官十五年冷官之考三閑居之歲久啜菽親旁與世不接十月三日又見其身之為計屬也一長一短徬徨四顧祇事之初賢車適至惟入公家則有使長入私舍則有親長均之事長若父與兄僅見迹罵俾得視梓人之色執茲役而趨以底于成如我元僚之賜子弟有請長者宜許之

某切惟逐騎遣行之時僕也未至一牋燕賀不得與同列俱至既也又不能專价而馳隆施行之珠至侈甚牽

課慶謝不敏不工併二罪而責之夫奚辭

某晉越加拜后問行軒珪聚自天錫羨河漢无極恐有
委役請于前驅

回司馬司理

方烏山

某伏以南風之薰槐晝清潤恭惟某官候騎鼎來平反
聲沸吉衛鱗襲台候動止萬福某熏板柔訥奉迎先驅
伏俟裁幸

某仰惟名家偉人遊戲官轍存養於潛虛得法出入於

通鑑自隨世俗茵鼎腐辭某無所容喙

某恭審瓜期熟戍李掾趨行吏民欣狂獄之清臺郡僊
家賢之至伏惟歡慶某敬以某官文武淵源之所漸濡
器度才識之所植立自許簪紱便是地位中人屑二州
縣似不憚煩意其重厚難進謙晦不伐蓋家法也朝家謹
于庶獄非格高者不在此選俛於一得非于門愈大之
兆耶亟通金閨還賜寶笏某尚幾親見

某半生景仰聞家不在兒童走卒役山川寥闊親炙無

從不圖以文學掾獲尾英游見未見聞未聞將自是如謂戶外之屐不折者非情也日夕傾企

某一生骯髒寡諧尤不曉場屋舉子捷徑亦不失一第再青家瓊忝倖甚矣倚席止一年有奇罵鄭虔嘲邊韶之聲幸不到耳然自揣瓠落決非可以追時好取世資者昔者先正其於待人處已事君立朝具有本末聞孫是以讞議之暇某不敏尚願有請於下執

某僻處空山與時邈不相接忽聞前旌壓境亟課僊語

自通姓名定落人後震擲而原省之某幸甚

某揆分尚新不敢僭申隨軒眷聚福履之間伏想轍迹
所迎第社駢蕃新治恐有委令某不敢以冷官為辭

回趙知錄

方烏山

某伏以回風癡雲商量欲雪恭惟某官綱紀名都先聲
載路清寧顯相台候動止萬福某熏被竿牘仰闕賀床
伏祈謦省

某欽惟天家英雋來自日邊次舍所臨呵護鱗襲溯江

度嶺濃霜戒晴愛日轉燠即天相也膳服贅禱何庸多談

某茲者恭審選勝卸鞍洎剛滌籀千里聳觀於佳掾一城駭歎於神君輿言相懽幕下增重伏惟贊慶某敬以某官神明之超然信厚之藹然博洽之充然儲書天祿閣獻樂三雍宮則其選也曲江宴集歲行且再周矣猶在州縣間何耶糾郡雖號都曹在執事居之則為俯就抑輕車熟路不嫌更展三昧手浮屠頡合則徐行於前

者固所以緊擢於後也某何幸拭目

某異時塵隱王城距雪上一衣帶水好事者輕車小舫
暇日過從不踈里中勝游多獲詹際雅聞名德欲見无
繇何圖茲今有此并合殆佛家所謂宿昔緣耶喜見顏
間自賀欲舞

某才不瘡人以格分教謁來倚席幸與士友相安無桺
子厚所謂拂耳搔心之事惟是狂名久著實行未孚肯
心雖勤綿力不逮先達名子見事多涉世久忠焉能勿

誨乎不揆下風斂衽忱情

某久徯車塵方脩贄禮居僻偵伺不的竟為記室所先
亟抒賀忱且謝隆施不敏負罪伏惟台慈實寬假之
某僭易端拜申問使闕隨軒瑤輯伏想由堂徂序僉擁
新祺冷廳委官令聞命請自今始

回交代葉判縣

劉後村

某伏以四月維夏暑風清微恭惟某官政成岩邑民譽
藹然靈脩森介台候動止萬福某熏板拜手登名記室

仰乞裁幸

某寒暄庸敬前蒞惟謹比辰梅潦初收不稔台用何似
欽惟民之父母神所勞相更冀順百里之望四時之和
以對薦書以輅召節某誠敬

某敬以某官靖退之風廉約之操望之如振鷺白圭殆
非塵土中人東陽壯哉縣異時人望而畏執事為之三
年有成未嘗擊斷而豪強退聽无所綜練而事物自理
蓋其恂懔無華似劉州方高簡無欲似元紫芝至於鹽

策賦板綽有餘裕雖聖門由求不能過也上方收召羣
賢褒表循吏解印入覲必為清望官矣某不佞

某服膺名德願執鞭為御之日久矣山川間之厥路無
由適有天幸獲繼芳躅快景星之覩託雲來之好乃自
今始遙遡風高喜而不寐

某少時妄喜功名二十年間浮江淮放浪嶺海時命大
謬始欲入山讀書然世故轆轤隱事未諧去春集注欲
擬茲闕人皆曰是不可嚮邇或又曰今明府整頓一番

昔之難者轉而為易矣愚意遂決然才短智鈍視閣下
無能為役凜焉它日敗闕是虞所恃良法美意悉可循
守嘉言善話不吝啟發萬一藉手蒙成以不為交承之
羞抑門牆之賜也敢布腹心惟執事實圖利之

某屏居村疇戍期尚賒未獲踵門先辱華翰迺知高誼
度越古人某不敏甚矣斐然短牋姑以見執贄之恭致
負荆之謝筆硯久廢言語不工倘垂覽矚幸甚過望

某惶恐僭越端拜申問使閣尊大之眷伏惟德星所聚

和氣致祥田舍恐有使令拱聽鐫曉

回新黃判丞

劉俊村

某伏以暮春之月天朗氣清恭惟某官騎氣鼎來貴名
日起靈修森介台候動止萬福某敬奏記于主書切幾
鑒省

某暄涼彞敬已肅石染比辰未諗台用復異似敢乞為
器業之重珍護次舍對越薦敷至扣

某粉榆錯壤挹芳名於方冊間亦有年矣前此常恨未

及及一面敢謂試吏于茲遂有同寅之幸承顏接詞自
今日始遙睇前驅預切折躍

某切以某官自其在場屋時已負重名每一篇出士林
傳寫為紙貴置之紅藥紫薇之畔夫豈不宜顧來拂藍
田壁記耶新天子方留意翰墨馳情文賦必有吹噓送
上者某欽遲

某不量謏薄冒試劇邑賦訟浩繁臺府迫近凜然有不
勝任之憂賢者此來休戚同甘苦切必有以扶持而箴

切之某庶乎其知免矣通贊之始僭布腹心惶恐死罪
某茲承瓜戍有日方圖修敬過沐謙光先貽華問不腆
短啟姑敘好雅非所以論文也儻垂電覽榮幸孰甚
某僭越再拜敬問台閤瑤眷伏惟自天錫羨如日方升
邑中預有翫願垂鑄曉

回李判簿

方秋崖

某伏以春酣霧景花柳事殷恭惟某官老成典刑惠我
巖邑有嚴有翼台候動止萬福某敢拜手以復典史者

為里父老賀

某聞動靜吾乾坤也呼吸吾陰陽也君子用易之泰消息一身蓋造化之委和具焉鼎烹養賢惟左右者之宏其用

某得之父兄之言曰自爾去民畝為士伍賢大夫之屈吾鄉者僅若而人有來枳棲真古仇覽惜爾之交一臂而失也邈瞻家山有嘅其歎

某惟孔子先薄正大訓凜然孫實所謂士安得自高蓋

猶未足與語此執事筆扛龍文百斛之鼎手探鳳巢五色之丹繇他人觀之謂當跨閬風登崑崙而乃肯以朱墨最僻縣或者吾夫子之意與何以薦聞厥有董德元故事

某識字田夫耳歸眊吾故牛衣未寒諸公不相知留佐軍者三年矣敢謂憶松江之鱸而來乃復跨楊州之鶴而去從古所歎行或使然

某有茅半間比鄰明月今燼矣人或以為王參元賀然

相攸瓦礫中心怛兮賢哉大夫寧無惻於此用敢介吾
翁之舊以請

某踈遠也望九霞飛珮之仙惟有虔敬若曰奉區冊云
者某惟力之眊

回泰寧張縣尉

方烏山

某伏以夏既初望天氣清和恭惟某官司警花城先聲
籍甚相維天只台候動止萬福某謹齋宿登名于主書
吏伏俟裁幸

某欽惟偉人家于三十六洞天之下扶輿清淑與生俱
生燠金涼茵無庸薦食煙火語


某茲者恭審趣戍解鞍消辰滌籀吏民改觀田里懽呼
伏惟贊慶某恭以某官士林之秀學者之師其博習也
可儀儒館其練歷也可陪國論明庭上對柄人物者蓋
思所處願解鵠袍紆黃綬雖曰資格貴然非所以旌
宿學也抑前賢不卑此官謂與民最親可以行志及物
勉於一來意或在是鵷鵠告祥鶚薦且交上某惟有拭

某從少父兄宦遊于建丹山碧水賢豪多獲交際歛衽
下風浩有歲月不圖茲今諧既見之願於是雲萍增一
板矣如之何勿喜

某孤苦百罹甫收一第以格分教非犯好為戒也幸甚
常僚實維前一輩人攷德問業將於是乎在然執事方
有百里鄉鄰之托不知可以數奉從容否也興懷及此
不勝卷卷

某引領前旌方欲以姓名自通不意乃為記室所先遂

墮不敏率課儷語且賀且謝知不足以辱覽幸發一笑
某惶恐僭易申問隨軒使眷伏惟由中及外序擁休嘉
冷廳有可使令願稟要東



翰苑新書別集卷六

欽定四庫全書

子部

翰苑新書別集卷八

詳校官中書_臣康綸鈞

主事_臣祁韻士覆勘

總校官知縣_臣楊懋珩

校對官中書_臣牛稔文

謄錄監生_臣王宜

欽定四庫全書

翰苑新書別集卷七

奏狀

申省狀
進貢狀

陳乞狀

辭免兼直學士院

劉後村

臣今月二十四日恭準尚書省劄子脩奉聖旨劉某兼太常少卿兼直學士院者寵光洊至謫薄曷任伏念臣隨召節而起家携束書而詣闕誤叨獎擢不俟對揚深惟九重特達之知豈非千齡稀闊之遇退而自揣凜乎

未安與其忘分量貽笑於市朝孰若以情實自歸於君
父蓋頌臺之弄印俾文館而代庖故府有舊典禮經之
存同列有議郎博士之助尚堪黽勉仰奉使令至如禁
林以待宗匠億負時望石介乃改其文軼冠制科韓琦
尚難其進於皇聖上尤重詞臣此年以來久虛此選又
况燕間珥筆煌煌雲漢之章英俊如林粲粲奎星之聚
寧无大手可望末光臣曩攝贊書了无新意旁觀莫掩
已試可知加以三年不治筆研之餘一病僅延喘息之

後遺編久廢未暇溫尋殘錦无多安能潤色倘貪榮進而冒受將為明時而起羞欲望睿慈俯矜愚悃映藜閣上姑令讀未見之書視草禁中宜改屬能言之士所蕪太常少卿臣已擇日前去供職外有直學士院恩命乞賜寢免冒黷天威臣下情无任恐懼之至

辭免蕪崇政殿說書

劉後村

臣今月初四日恭準尚書省劄子脩奉御筆劉某王撫並蕪崇政殿說書者渙渥游盼震驚靡措切惟旃厦乃

陳善閉邪之地朝廷多通今博古之儒曾謂諛聞迺叨
新擢伏念某少雖專苦晚益情荒頃逢負扆之知嘗尾
執經之列自愧鯁生之淺陋莫述聖主之高明方王求
多聞既旁延於鴻碩意愚有一得俾重侍於燕閒然而
念舊者君父之仁量力者臣子之義倘濫陪於誦說將
奚補於緝熙敬望睿慈收還誤寵姑容末學安芸館之
校讎別選髦譽備金華之顧問所有恩命未敢祇受

辭免除起居舍人

劉後村

照對臣準十月三日省劄備奉御筆除臣起居舍人者
俶盼奎畫交戰危衷伏念臣近以衰殘輒求休致露章
雖切天聽愈高適值朔祭有嚴恭謝已迫遂勉竭駿奔
之力庶幾逭瘴曠之誅止竢禮成復伸忱悃忽叨渥
良劇震驚切惟振鷺之羣尤重立螭之選平生夢想所
不及一旦遭逢而躡升既貽昭代乏才之羞亦為明主
知人之累而况臣半暮在列八䟽乞骸心勦力疲辭窮
理極設若為卿監則頻數引去擢記注則徘徊復留是

懷利以事君且矯情而罔上縱聖恩寬其鼎鑊之戮然
公議甚於斧鉞之嚴蒙此惡名喪其素守庸敢瀝肺肝
之懇非姑為文具之辭欲望睿慈特垂淵聽察臣前請
寢臣新除俾挂衣冠歸尋醫藥實出君父終始生全之
賜所有恩命未敢祇受

辭免陞兼侍講

劉後村

照對臣今月十九日伏準尚書省劄子三省同奉御筆
劉某陞兼侍講者渙渥做盼震驚罔措切以經惟所繫

綦重講席之選寢高昔專處法從近臣後參用諫官御史非博洽之前輩必直諒之端人如臣者記誦荒疎敷陳短拙荷冕旒之寵獎侍旃廈之燕閒所習鯁生章句訓詁之言不過口耳其於聖主緝熙光明之學奚補毫芒顯黜乃其分宜驟遷出於望表陪諸老先生之末猶恐不堪列前師後誦之間孰云其可倘或昧循牆之義必將累當宁之知欲望睿慈俯矜愚憫姑令樸學少安夕說之聯別東名儒俾效辰猷之告所有恩命臣未敢

祇受

辭免除秘書監申省狀

劉後村

照對某準樞密院遞到存字號黑牌皮筒十年十二月
初一日省劄一道三省同奉聖旨除某秘書監曰下前
來供職某叨承詔禮超長仙蓬願暮景之摧顏被新榮
而戰駭伏念某向者受知君父接武美髯預東觀之討
論攝西垣之封駁誅巨姦而奮筆螳螂之臂獨當賣明
主以求名犬馬之心不忍義存補益事已挽回尚責詞

臣而求全似為權相而報忿終南回首觚稜常繞於夢
魂楚澤行吟玉座未忘其名姓升朝班於金掌將使指
而繡行及纍然衰蹇之中復訪以汗青之事孤恩至此
杖涕何言枕塊之禮難終予環之命隨至遂繇草野重
領石渠而某幽憂三年沉痾九死召不俟駕固威命之
莫遑殫未成聲覺餘哀之猶在况位置高則必招天下
之公議辭受審廼不為名教之罪人輒控異函冒干化
治欲望敷陳危惴寢免除書倘未容掛神武之衣冠亦

姑俾奉祠官之香火某无任俯伏俟命之至伏候指揮
正月十七日三省同奉聖旨不允

再辭免兼直學士院申省狀

劉後村

某近具奏辭免兼直學士院今月二十七日伏準尚書
省劄子脩奉聖旨不允者俞音尚闕忱悃未孚遂忘再
瀆之誅冀動四聰之聽切以摛文地遽視草才難思蒞
則起春江上水之譏詞羌則貽拙匠血指之笑如某者
兼有二患了无一長倘以山林小家數之文施諸朝廷

大典冊之用設有非常除拜不測傳宣勅使條臨院吏
傍趣一辭莫措百醜具呈非徒裁身抑且辱國此先朝
張方平所以有當自量度之戒而近世葉適所以必力
辭兼直之除矧如後學之么微莫企前修之萬一剗肝
瀝請頓首固辭欲望敷陳亟行寢免繩樞草舍愧非修
鳳之才金馬玉堂別選提鰲之手所有恩命未敢祇受

再辭免兼崇政殿說書申省狀 前人

某今月初七日準尚書省劄子以某辭免兼崇政殿說

書恭奉聖旨不允者某昨陳引避之忱未奉曰俞之詔
雖外貪於光寵然內省於空踈當明師在廣廈之時奚
庸末至誦君德由經筵之語安敢冒居欲望朝廷特為
敷奏別選通經之士仰裨典學之功所有恩命未敢祇
受

再辭免修史申省狀

劉後村

某近具奏辭免任責修纂四朝志傳等續準尚書省劄
子脩奉聖旨不允者未奉帝俞游陳愚悃伏念某奮身

凡品受上異知拔諸米鹽簿書之麓官寘之言語文字
之華選使赴湯蹈火亦報禮之當然况弄翰濡毫乃平
生之至樂豈不貪承威命趨就消埃顧中興業鉅而功
崇信史事大而體重宜屬當世鋪張閎休之大手仰副
明主緝熙鴻烈之盛心而某舊聞既荒宿恙復作雖欲
起趨執簡之列其如方困采薪之憂伏枕矢詞扣閣瀝
請欲望矜其迫切賜以敷陳別東三長之通儒共成一
代之鉅典

再辭免新除起居舍人申省狀 前人

照對某準初五日省劄以某辭免新除起居舍人恩命
奉聖旨不允者重念其所抱沉疴已詳累疏才非揚億
不敢為陽翟之行官似知章止欲乞鏡湖而去眷留未
替拔擢有加屬齋居決事之辰叨柱史記言之選居常
旋暈於侍立之際難素乏建明恐直前之職曠而況力
甚驚而已竭居非駟之能追倘昧牢辭但貪榮進及物
議並興而攻詆雖聖恩不得而保全欲望朝廷特為敷

奏寢免新渥放還故山某无任席橐竢命之至

辭免除右文殿修撰知建寧府申省狀

照對某二月初七日準省劄奉聖旨除某右文殿修撰知建寧府者技拭驟加省循增悖伏念某昨者自量朽拙難玷清華六丐退閑兩求休致不能決裂徒積悔尤及煩霜簡之暴揚尚辱奎文之揜覆進無路以報明主歸无辭以白先人朝夕思惟淵冰兢戰至如陞華貼職起廢守藩非朝廷勝流則中外宿望今畀之被譴汰歸

之冗士若待夫以禮去就之近臣實孤危晚暮灾身之
媒亦始初清明除目之累蓋嘗熟計惟有固辭皆流出
胷中之言非漫為高上之語欲望公朝俯憐懼切力賜
敷陳挂洪景之衣冠或未令於謝事收買臣之印綬姑
俾遂於視釐所有前件恩命未敢祇受某下情無任俯
伏俟命之至

辭免暫權福建路轉運副使申省狀

劉後村

照對某三月二十四日準省劄奉聖旨某時暫兼權福建路轉運副使者起廢過優省愆知懼重念某久抱負薪之疾幸返故栖力辭剖竹之榮庶安晚節惟明主深哀小臣之流落而公朝不忍一士之棄捐異牘甫馳除書游至轉輸一道宣布六條仰稽慶歷淳熙之盛時有若蔡襄林杓之前輩凜然清介對此寵光今以衰憊飾巾之人責之激昂攬轡之事况漕計非書生之素講且鄉嫌在令甲之尤嚴雖曰暫兼亦難冒受揣量至審

偃僂固辭欲望朝廷持為敷奏姑令暮景改尋香火之盟別選時髦增重節麾之寄所有前件恩命未敢祇受
辭免右文殿修撰提舉亳州明道宮申省狀

劉後村

照對某伏準省劄勅劉某依舊右文殿修撰提舉亳州明道宮者伏念某昨者召歸當舊相之末斥去在諸人之先每責已以省愆尤杜門而畏禍聖朝更化賢揆奮庸垂紳之流舉笏以賀既不敢獻徂徠之頌亦未嘗通

元城之書上恩偶畀以節麾物議遂疑其鑽刺將煩抨
劾切中隱微祛終朝黜未塞責蓋無狀名姓常汚人齒
牙對揚者加邪說攘臂之名封駁者極僉人秉筆之詆
外積衆毀內無衷言幸逢真主之英明夷攷累臣之平
素忽叨華職且領叢祠磨玷蔑聞還毡太驟豈不貪朝
廷之榮寵恐又費君父之保全欲望鈞慈特為敷奏反
汗亟收於前命餘齡庶免於後災某無任席藁俟命之
至所有恩命未敢祇受

辭免除都大坑冶申省狀

劉俊村

照對某十月初六日伏準省劄奉聖旨某依舊職除江
淮等路都大提點坑冶鑄錢公事者除書驟下感涕交
零伏念某頃以空疎列于華近迫招徠而後至遭彈射
而先歸絕筆不作子公之書飯蔬終無伯氏之怨閱歲
華之四易值鈞播之一新元夫臣人予環相繼前侯故
將復玷者多至如毫矣之夫亦忝使乎之選切聽道途
之傳說皆言君相之憐才初无先容遽出新命而某病

根猶在年事向高更衆毀不直一錢之餘退安田舍當
明時欲捄五銖之弊責在鑄官徒泥方穿詎通圜法倘
辭受之際不審則曠瘵之悔奚追欲望敷陳亟行寢免
擇時髦而臨遣俾晚節之保全所有前件恩命未敢祇
受

代范丞相乞退閒

方秋崖

臣屢貢封章丐從罷免聖恩天大委曲諭留臣夙夜憂
惶哀病增劇政恐溘先朝露上累聖明蓋以陛下實英

睿有為之君而臣亦不肯為頑鈍無耻之輩若陛下優容不斷臣遂偃蹇自如君臣之間胥失之矣兼臣昨蒙內引即已跪辭豈有今日違離清光明日出入禁近其為舉措殊失觀瞻每出城闕輒宣恩旨待罪于外厥路無繇臣今只得卧病杜門祈天從欲中書庶務難以與聞臣已截自某日雖常程文書一切不敢書押外跼蹐俟命必得請而後已陛下不早賜處分却恐以次臣輔未免尚避嫌疑必致彼此因循稽壅朝政今何時也而

可以臣費日乎成斷少遲愈重臣罪陛下雖欲寬其雷霆之怒而不可得矣伏望陛下憐臣之齒髮已朽察臣之肝膽無欺前後奏陳必留聖抱若不上勤省憶真成脩禮之為罔上之誅豈容苟免臣不勝大願願賜骸骨歸田里使去位一日而填溝壑臣瞑目無所憾矣煩黷天威臣無任恐懼怔營祈哀竢命之至

又

方秋崖

臣猥以衰殘之年迫於危篤之疾懇求骸骨脩滯肺肝

方幸天意哀憐奎章開允恩隆眷厚感極涕零而臣猶有區區之愚不勝縷縷之黷切以臣稟賦迂拙遭逢聖明久污清朝遂登元宰顧微臣之謹畏惟陛下之簡知外此无長自量甚審既遂山林之衰老已為天地之生成而乃峻以文階冠于書殿優遊直館密勿經帷凡往前歸老之大臣無今此便蕃之異數人將不恕臣亦何顏伏望聖慈盡免殊恩曲矜晚節但令閑退即是寵榮所有特轉兩官恩命臣不敢祇受外欲乞別降指揮許

歸田里臣不勝云云

代趙參政丐祠

方秋崖

臣輒控危衷仰塵睿聽臣聞君臣相與惟以真情命義之間蓋有大戒其知進而不知退則天下之大戒謂何欲言而不敢言則臣子之真情安在臣今懇請天實鑒臨蓋以臣本之脩能僅堪煩使當分柵東淮之日忽叨恩西府之除自以授任於領兵謂宜聞命而就道第亟祗於召綽寧敢與於事權倘得至晁旒之前便當乞骸

骨而去不圖未回天聽噴有人言是以惴恐而控聞蒼黃而遠逝當時言者之有劾至謂微臣之無君及茲化瑟之更偶與招旌之數則其趨走豈敢次且臣雖至愚極知非據直以君臣之大義不可終絕於闕庭天地之隆恩不可委棄於草野詎勉一至荏苒兩年其若庸材不迺聖鑒今齒髮日以遲暮筋力日以疲駑課其功能負此歲月欲望聖慈察臣之孤立寡與憐臣之朴直無他几茲懃祈盡出真實俾歸田里以畢年齡則君臣之

真情以孚其命義之大戒以著在臣某為有進退之分
在陛下為有終始之恩一遂所祈兩極其至惟陛下幸
垂聽焉臣無任激切祈天俟命之至

南康軍丐祠

前人

某輒控愚忱仰干鈞聽某蒙恩假守待罪踰時適當凋
瘵之餘殊費補苴之力帑廩幾於赤立鬚髮為之白紛
事事荒殘殆難措手日日整葺良以焦心久欲控丐祠
之章或又拘蒲歲之典赳赳不勇跼蹐靡遑忽有得於

傳聞實不勝其幸會某今月十八日據邸報內一項知
南康軍方岳與新知邵武軍游孝嚴兩易其任某治郡
無狀法當汰歸得報易麾尚從禮遣此雖廟堂委曲之
意政契田里便安之私除已截日不敢治事外欲望特
賜敷奏別賦叢祠某只候省劄到交割與以次官一面
起離前路聽候指揮

申省乞祠

方秋崖

某昨蒙公朝起之牛舍分以魚符近次無旬月之淹鄰

壤無蹄輪之役非不感聖恩之寬大戴元宰之生成而
某賦性寡諧與時多迂雖大君以天為度必不以一青
離匹夫而微躬無地可容自當終此生編民伍倘不量
而冒昧恐益重其顛隲比以近降指揮已嘗被受今聞
遣迂敢勿控辭欲望特賜敷奏仍畀叢祠以安孤跡

進銀狀

前人

斗樞瑤月式篤商生尺地寸天適修禹貢前件物有邦
之式厥賦惟中仁壽八荒不寶褭蹄之品玉帛萬國但

欣虹渚之祥

翰苑新書別集卷七

欽定四庫全書

翰苑新書別集卷八

致語

天基錫宴

方秋崖

伏以聰明而作元后天開甲觀之祥富壽以祝聖人春
洽乙飛之旦罄四海呼三之頌上萬年第一之觴恭惟
皇帝如日華暉如乳粹健用衆君子裂陰霾而劃開更
一化元洗陽光於晦蝕言觀左臯夔右稷契直欲駕唐

虞軼商周得新日新而又新有赫太平之象道大天大
而亦大於昭震夙之符嘉與涵生共陶熙旦臣親逢聖
世雅習治音擊壤有歌望雲以奏

春綠晴融太液池
好風都在萬年枝

宮牆璆玉韶音遠
合殿珠環曉漏遲

天近六龍扶翠輦
雲深五鳳挾瑤池

鎬京長啟需雲宴
先奏端平第一詩

玉母望闕

方秋崖

伏以歲重光而開景運海岱同春河一清而生聖人乾坤齊壽華星流渚霽色浮空恭惟皇帝乃聖乃神惟精惟一仁義既効陰陽和五穀登金華已平邇鄙寧四夷服農桑萬里書軌一家洪惟龍御以來無此駢飛之盛慶彌普率頌洽盈成律八十一寸則一分又定閏餘之厯筭二萬三千有三百適臨亥首之期申命用休惟皇建極臣等生逢堯舜世習師襄敢傾魏闕之心肅奏康衢之誦

曉蹕初催上壽班

東風連夜致人間

九重春醉金鸞殿

萬歲聲幽碧玉環

大地山河年穀熟

太平日月羽書閑

明朝第一番花吉

併與瓊幡下虎關

天基節當筵致語

方烏山

麗正門前壽慶兕觥之祝熙春臺畔恩榮燕席之開光
近九街懽騰千里恭惟某官二鍾秀氣雙井名家久騰
康海之謠天為啟齒再擁專城之重雲自无心以笑談

風月之餘來管領星辰之聚丈夫當為真耳詎容樵水
之留侯王亦有種乎行襲荷囊之後提刑司直倫魁望
閱膚使清名弓矢旗旄未覺玉關之人老園林鍾鼓若
為珂里之身間便對三朝趣儀九列提舉寶謨筆工地
草秀襲堦蘭福德瑞時向迭奏填荒之和長庚烟曉今
獨當衣鉢之傳新秩架高舊壇焉往濟濟寓公之接武
彬彬時彥之益簪會福地之羣仙聽鈞天之方舞恍對
端門之曉移來禁苑之春滿座祥風誰道天上人間之

隔來年今日回為柳邊花底之遊仰對周筵偕歌郢曲

曉日金門氣鬱蔥
人間萬里總祥風

再登況遇三登盛
獨樂何如衆樂同

行有玉觴陪過列
豈無金鑑洞遺忠

天恩年壽何分別
盡在簪花舞蹈中

宴徐大參
方壺山

閩分紫索新錦里之行春禮重皇華張綺筵而十夜丹
山偉觀一道雄聲恭惟某官名蓋八紘道闢四氣學問

術業渾淪姬孔之規模議論典刑活脫富韓之人物所
謂百年能幾見何止通江第一流繇桂府以召歸陟松
陌而深峻萬鍾千駟莫移家食之心一馬二童殊渴都
人之望履聲未到黼舂愈深恍聽樂於鈞天命開藩於
福地萬釘寶帶視真文昌十丈牙旗作大元帥建碧油
幢於甲第羅紅帕首於午橋憶昔端平號小元祐嘗以
七閩之重鎮畀諸一代之真儒旋上政塗未弘相業今
時望復歸於南浦若明入即向之西山宜當聖天子眷

注之隆又究老先生經綸之志富貴歸故鄉豈為樂才
俊道盛德豈為誇霖雨四方端繫蒼生之福分高風萬
古好看黃閣之聲名麻汗芬芳棣華輝映我都運竭來
弭節親見滌符昔託好門牆見謂金蘭之友今相望臺
閩皆在桑梓之邦豈不望我公歸姑且為閩人賀酌同
心酒哦有興詩又見鮮于公事坡仙於定武會如歐陽
子記忠獻之相州吹拍俚歌笙簫盛事

麟符久合換貂蟬

又向鄉邦擁十年

眼赤腰黃天寵澤

顏紅鬢綠地神仙

極知畫繡堪行染

見說宵衣正渴賢

好事還殊門外路

人看四輩下翩翩

宴湖南趙帥

劉後村

撤山前之薇戍方卷捷旗訪江上之棠陰忽聞歸騎延
為薄具以屈高軒恭惟某官峻特而潔清沈潛而剛毅
生長古靈之里甚似前修從游勉齋之門見稱嫡子真
吾徒之畏友亦近世之名卿清標洗五嶺之貪風妙筭

掃重湖之妖祲集衿佩於凋零之後多所講明營金湯
於談笑之間一何神速方名垂於竹帛迺興動於林泉
魯望江湖散人公雖甚適更生宗室遺老上必見思會
有鋒車徑歸禁索我知郡編修吏部交游最蚤聚散
靡常晚繼踵於前規復借光於鄰績暫駐函關之紫氣
同凝燕寢之清香把酒而登雲山小休午暑聯鞍而游
雪鼓尚約秋風輒以心聲寓于口號

長劍高冠有駭機

平生受用一深衣

鳶方跼跼水中墮

鴻已冥冥天外飛

離索畧憑卮酒訴

淹留却羨角巾歸

祝公小住為佳耳

莫與江邊父老違

提刑曾寶章宴陳安撫陳侍郎樂語

鄭雪巖

玉帳總戎順天行討綉衣持斧易地欣逢十行誕布除
書八境頓增和氣好是戈矛整暇不妨樽俎從容坐折
遐衝動收勝筭恭惟知府安撫節制江西廣南福建兵

馬侍郎位望隆赫宇量恢洪賈傳治安大息書无非先
見武侯前後出師表可謂孤忠淮壖盡獲於風寒閭嶠
悉除於氛祲合展經綸之大手尚煩鎮撫於崇牙并鉞
參旌屬宣威於南浦奎章壁畫式借重於西清未露毫
芒早為卓絕憤逋誅之窟兔尚假息於釜魚命提三路
之屯妙運萬全之路憇棠猶在思北山賢守之來騎竹
爭迎喜東閣郎君之至尅期奏凱指日召環我提刑判
府郎制寶章久矣受知偶焉攝乏駕舟於波濤之上此

念則均攬轡於原隰之間肯安乎逸奉兵民之二印還
師師之一門稚耄歡呼後先輝映實為盛事爰秩初筵
對酒崆峒但覺江山改觀勒功浯水會看笳鼓歸來某
忝列伶工獲瞻華集敢哀輿頌上對台堦

聽得敷綸天上頭
二星交會玉虹流

風生三路軍容壯
春到雙江喜氣浮

談笑預知傳露布
勸酬只恐促更籌

會看印佩黃金斗
肯羨當年定遠侯

安撫陳侍郎宴曾提刑致語

鄭雪巖

使斧宣直指之威來馳騏驎傳帥垣陳無敵之武相會燕
江等是為民盛心恭成勤王偉績有前茅之先慮宜列
豆以交歡恭惟知府安撫節制江西廣南福建兵馬侍
郎地位穹岩天姿挺特鵠原並秀藉甚四傑聯名之稱
貂裘相承未數萬石傳家之眷帝眷北斗南之隆望公
開大江西之崇臺六轡在手如絲三軍歸心挾纊填伯
氏麓仲氏聲援翕隨東周公西召公股肱夾輔均軫推

車之助盡寬當饋之憂我安撫制師侍郎百鍊无非剛
一身渾是膽每耻匹夫不被固欲好生弗與此賊俱存
未能去殺憤煙瘴之塵未洗喜英雄之見畧同少延膚
使之臨大作吾軍之氣玉虹對酒莫辭鸚鵡盃之深金
闕上功相映麒麟閣之畫某等叨居樂部預奏凱歌上
對華筵仰陪清笑

恰好鶯花一半春

福星相會賴江濱

丈人師吉符前識

膚使心同掃舊塵

看劍引盃宜酩酊

輕裘緩帶倍精神

從今淨洗天河甲

有詔催歸兩重臣

彭知軍宴交代都運陳寶章

鄭雪巖

六轡載馳已戒皇華之禮樂一麾來守少陳祖帳之容
儀親莫親兮舊告新樂莫樂兮小比大賓筵初秩侯度
交歡恭惟都運寶章郎中名重如山心清如水康節先
生不作皺眉事器量儘寬司馬文正每務顧影行跬步
不錯仕宦三紀始終一誠自公南來寬上西顧塵清鄭

葦陰滿召崇政本慈祥十萬戶陰受其福里无愁嘆二
千石真調惟良乃眷奏功就加督餉福星臨斗牛之分
雲漢聯奎壁之儲紅旗捉賊黃紙除書聲不求於赫赫
畫棟飛雲朱簾捲雨君非羨於渠渠雖仁人初不計功
然天子必報有德自六品以至一品徑登二十四相考
中書皆一天此獨二天未忘五百里侯封舊地薄從設
席未聲攀轅判府從橐世臣止堂家學牛刀暫割聯興
十室之弦歌驥足少淹久贊一臺之計畫秋行湘水冬

涉橫江來分嶺畔之竹符共被日邊之綸綍喜尋賢轍
默契盛心作於蕭規守於曹隨民歌清一前有召父後
有杜母政紹中和面奉六條治无二致情相得而勢分
畧味既合而和樂同小攀行色之忽忽盡是滿懷之拍
拍傳盃莫放山色難留歸興濃調鼎可知梅花預報新
春好某等叨陳伶伎獲對台階敢緝民謠敬陳樂語

使軺嚴戒鼓逢逢

熊軾頒春到此邦

炳炳福星臨一道

融融愛日照橫江

斷霞秋日閑飛鷺

荒草寒煙不吠厖

臺府交歡同一體

從今俗返古淳龐

衆門生宴都運陳寶章樂語

鄭雪巖

皇華遣使臣以禮時異常儀弟子事先生有年欣逢盛事盍簪交賀望履生輝厚意肅將初筵斯秩某官卓犖今代老佛前身昌黎伯名重泰山親傳正學司馬公腳踏實地不務虛聲萬變無越此誠三晷積成一信久稽熊軾坐鎮魚城民遷善與日惟新天助順乃秋亦有塵

消渤海人歌二千石之良計上甘泉帝謂十一州之最
爰嘉撫字就命咨詢不勞原隰之驅馳已遍山川之跋
涉由偏州而升刺史舊典常聞自屬郡而登漕臺比邦
昉見况寵以圖書之峻品益增其廉訪之大權除目一
頒頌聲四起南浦飛雲西山捲雨放懷畫棟珠簾北門
視草東觀藏雲平步黃扉青瑣闔座衆官公門桃李匠
石榱桷不欲效季良願效伯高源流有自一舉得石洪
再得溫造臭味畧同恭捧螺盤前趨燕寢謂孔明之器

識寧久轉輸知黃霸之寬和必為輔相恐攀轅之忽遽
異揮塵之從容侍琴瑟於席前奏笙簧於堂下橙黃橘
綠一年好景之時梅粉楓丹十月小春之候可謂四難
并之會宜奉三達尊之歡言語雍雍威儀抑抑更長賸
燒千炬燭十分滿泛鸚鵡杯天上頻翻五色文一蹴竟
登鸞鳳闕某等叨陳伶伎獲對台堦敢采歌謠敬陳頌
語

紅塵驛走大江西

御筆親除濕紫泥

就徙福星臨一道

數為膏雨遍羣黎

粟芻妙幹多新畧

桃李重栽滿舊蹊

指日論功升劍履

未央賜燕月璇題

宴江檢詳

牟存齋

繡衣立綵服趨俯拾省郎之選玉露繁金天豁漫為司
馬之行不敢賡東坡點絳唇所願賦李賀高軒過意不
在酒文以足言恭惟判府提舉檢詳攬星灣之炳靈空
睢漠之藻繪焚香讀易得伏羲先天之心鼓瑟詠沂有

曾點莫春之樂耻作三代而下人物直求六經向上工夫去國身輕勢有如於飄葉在家飯淡人莫拵於餘芳幾年冷面世无知一片古心人不識令孤斟於北斗俄共理於西江文通五色筆重來尚記永明腳跡公著戲綵堂无恙猶存元祐歌詩從前麾節豈死人似此衣冠能有幾天全是樂人豔其榮矧茲一男子之行補此四先生之坐扶開宇宙千年秘恍如瀛伊洙泗之遊拈出江山一段奇便是睢嶽嵩廬之樣鸞皇之車先戒虎豹

之啄已空紫界宮墻且聽鷄人傳漏箭翰林華蓋又將
鯨力破滄溟通判校勘半刺佐州六條受察黑貂裘敝
昔慙閣筆於館中白鷺州橫今幸題輿於戲下初非展
驥徒贅畫蛇所忻丞壁之方書猶及仙舟之求駕名位
不同而禮秩亦異敢要龍節之來斯德音无爽而壽考
不忘願奉兕觥之躋彼已盡洗熱烘烘之暑氣好與談
活潑潑之話頭罵出谷後精神魚躍淵時氣象匪由強
勉直是相關莫教北海酒樽空用當南豐香瓣敬廬陵

風月三千指未問醉圓吏部文章一百年行抒遠用欲
資一粲更詠七言

神螺卷雨入田疇

留得公堂一片秋

天上已催郎署去

人間難挽使華留

莫嫌仲舉題輿晚

猶及東坡秉燭遊

易在虎皮公在坐

試開寶篋為人謀

同張倅宴吳吉州

年存齋

漢吳公治平之行稱第一流歐陽子文物之鄉非尋常

郡人與山川頽頽天開賓主逢迎新府肇開初筵肆秩
恭惟判府編修清防水刷健筆芒寒星時動少微燭擅
古括縉雲之秀世不乏季子卓為濮陽渤海之宗聲名
鞭翠鳳以參前步武駟玉虬而直上載武畧編摩之筆
望重紫扉惹文昌奏對之香班通碧落舟迎神山而引
卻香隨燕寢以清凝寶氣騰空久躍龍津之劍神光照
水終還螺浦之珠曾未挾於堯蓂已有光於漢竹望狄
公飛雲處好音時到於家庭登江武戲綵堂俚話重新

於州宅世元此樂人艷其榮紅粧執樂白粲連牆漸復
承平之舊觀赤羽曉晴金榜射日儲胥獻納之過聯而
我兩府判久矣仰高幸茲事長岷峨萬里心寒孤矯之
鴻江漢十年影斷未歸之鴈甚媿成都雙玉筍來尋湓
浦百花亭不圖無鱗之州獲際畫熊之軾人欲和別乘
清風之曲我惟誦棲枝明月之詩至後日長且喜剝陽
之盡盪夜來雲凍不妨需燕之式張笑其索於梅花舞
偏低於楊柳琵琶好聽未須濕司馬之衫有菽雜陳政

好盡醉翁之酒姑煩樂指申介壽眉揮萬字飲千鍾不
忝文章之太守薦三花裁五色會徵岳牧之詞臣某等
濫廁齋優獲觀魯燕輒陳口號上贊頌行

新陽葭琯已浮灰 昨夜珠從合浦回

曉日鸞旂新竹契 春風龍炙古蘭陔

青原別島斟丹酒 碧落仙人醉玉梅

來歲五更三點入 直迎紅藥看蒼苔

邵武宴交代權郡 方秋崖

半刺史行刺史豈惟風月之分今將軍故將軍共喜星
辰之聚碧玉環收霖雨黃金印領山川歡奉壺觴相傳
衣鉢恭惟交代書潛攝極劔躍龍津江夏之才无雙幼
余有此奇志潁川之政第一今何為乎假侯瓜時近在
一日間芝字飛從九天下小徐王覲有為民留謂且握
手出肺肝尚邀陰賜其將與帝作喉舌於赫陽光我知
郡式開我龜乃發爾爵念生平之少可无今此之佳逢
舉扇障西風公毋多問持盃勸北斗夜未渠央畧駐皓

歌試聽興誦

誰作山城三日霖

老天自識兩賢心

樵溪留得琴龜住

廬阜飛來笙鶴音

綸綬泥香千里共

袴襦春暖一盃深

薰風輦路重携手

夜對金鑒月滿襟

趙制使宴吳宣參

方秋崖

飛書諭蜀未跨錦衣之榮擊楫渡江匪戀綈袍之舊抵
掌而談當世事知心者有我輩人要共清並塞之煙塵

初不為今宵之風月恭惟某官秀出於魚鳧蚕叢之國
儼立於夔龍鵷鷺之班口伐可汗漢廷无出右者泥封
函谷齊國其庶幾乎上加殿西角頭世有老東坡手咨
爾王佐宜我皇威安邊境成功名不再舉矣識時務在
俊傑思一詣之春生淮海之樓光動斗牛之宿我某官
情深鳴玉詎重斷金江國幾離亭邀淵明於半道宇宙
一杯酒餞相如於故鄉少停皓齒之歌各吐壯懷之畧
攪河而洗兵甲想忠義之相期折筭以筭羗夷當笑談

而自却敢陳俚頌共徯雋功

二老風襟了不羣

笑談自可却塵氛

詞臣舊奏平淮雅

里老今傳諭蜀文

吳國隱然如一敵

趙邊足以張三軍

莫辭整頓乾坤酒

捷羽飛來共策勲

宴吉倅王賓之

劉後村

瀛洲學士為江鄉半刺之行句曲山人惜親友中年之別將秣馬膏車而去矣廼殺鷄為黍以留之恭惟某官

志節日烈而霜嚴文章水漏而山出聲名蚤著不數黃
香之元雙科目小低猶壓杜牧之第五元化孕此五百
年之間氣同輩立於九萬里之下風每以直道而事人
未嘗曲學以阿世朱雲折檻諸公慙請劔之言楊子哭
廷千載壯裂麻之舉一葉身輕何去之勇六丁力盡而
挽不回有謫仙人駿馬名姬豪放之風無杜陵老殘杯
鈴悲辛之態仲卿妻安牛衣之儉超宗子真鳳毛之奇
下而一障上而公卿會應入手徵以諫官許以宰相尚

且掉頭擁通德而著書命便了而沽酒麗人歌陶秀實
郵亭之曲好事繪韓熙載夜宴之圖賀客盈門勸展驥
而為別駕長官分席嘆无蟬而占監州想像醉翁澹庵
之勁節高風收拾平園誠齋之殘篇斷橐覺此行之不
惡然小住而亦佳方今圖回一新號召四出加璧而延
故老將行申公之言前席而訪逐臣必奉賈生之對豈
容州佐屢屈天仙况頭廳迺吾鄉兩相之迭為而鼻祖
云異日二郎之必做閉門而投車轄莫惜盡歡籠街而

築沙堤佇看大拜風雲之會暮月猶遲我崇禧吏部少
同受業於河汾晚共尋盟於咨社辭暴公子之繡斧未
敢披襟聽白司馬之琵琶何須掩袂素蒙鮑叔之知己
詎忍卜商之離羣肯顧茅堂不嫌草具南轅北轍車輪
慣見於別離東主西賓翰墨未妨於遊戲俯陳下俚仰
獻初筵

去國還山忽十暮

看人着盡幾枰棋

碧雞金馬非吾事

白鷺青原欠子詩

魯國兩生肯行否

海濱一老莫來遲

暮雲春樹嗟脩阻

得句從今舉向誰

郡武宴瞿通判

方秋崖

天子使來監汝共管溪山使君於此不凡且談風月醉
我一壺玉熙然千里春恭惟府判大音函胡老氣碑兀
覺畫溪无邊煙雨儘有佳遊退思富不盡經綸聊復小
試未必一官落拍只今半刺翱翔長史雖老宰相材何
當驥展丈夫安能州別駕邇已雄飛而我知郡及爾同

寮幸茲合席西風穠稔不妨無鱗有監州北斗闌干何
惜吹龍將進酒待歌興誦誇與樵人

肯駕縵屏入古樵

熙春山更綠岩崑

人如第二泉清冷

路亦無多秋沍寥

碧色玻璃供笑語

黃雲穠稔入歌謠

山城斗大能留否

見說方旌有特招

宴黃狀元大任

史權府

金榜新狀元獨賞瓊林花市綉衣舊使者相逢碧水舟

山魁星交映福星今夕不知何夕百年盛事一郡驩聲
恭惟某官天馬風標雲龍氣局筆下五十絃錦瑟宵中
三萬軸牙籤出武夷之仙峯盤空雲氣接金華之嫡派
滿壑風聲明經卑左氏公梁射策壓公孫晁董驪髀爭
摘鷄口先鳴姓名千佛塔頭步武三神山頂飄然遡紫
拖青客可是依紅泛綠人五色雲香已驗掄魁之符幟
三台星見好恢公相之規模我知府某官劔外陳人湖邊
隱士晚得一衫而出蜀星馳兩節以落南面首少年三

五時也曾効東塗西抹舉目青雲九萬里豈思北運南
搏幸逢蓬島神仙細說杏園舊話玉壺歛灝翠袖踰隨
我輩非偶相逢這會莫辭一醉楊柳樓心吹夜月試問
海棠沉香亭角醉春風吹冷芍藥強哉俚語上侑清歡
月色花光正可人
笙歌會處喜津津

跨鰲海上文章客

攬轡天隅禮樂臣

丹碧屏前三月暮

玻璃杯裏一團春

暫聽紫燕黃鸝語

更捧紅雲侍玉宸

南康宴考試官

方秋崖

思皇多士偉制詔之賓賢作者七人實文章之司命甫
爾微棘幸哉識荆敢敬奉於壺觴切願聞其衡鑒恭惟
主文胃羅斗宿手抉天章五經紛綸取青紫而芥拾地
八韻晷刻補造化而聲摩空乃持玉界尺以裁量無復
古戰場之遺失監試與聞選事獲並英遊煩彈壓於秋
風諒屬厭於春藻日五色而不迷過眼酒一尊而細與
論文尚有黃華可無清句

廬山誰與主文盟

入得光芒北斗星

筆可補天親奏賦

芥如拾地久明經

諸賢等是良眉白

五色難迷老眼青

來歲不妨連舉送

編排詳定又彤庭

郡武宴進士

方秋崖

碧玉環中詩書多
士黃金榜下禮樂兩生鄉
間榮錦綉之還郡
國圖衣冠之盛恭
惟兩新恩禮園書種藝圖文
芳摘藻挾天庭初啟九關之
鑰掛帆拾海月共航八月

之槎新題鴈以來歸覺詔鴉之猶濕春山一脉斷者續
之泰階六符今其再矣自此書林動星斗直從科目上
公台而我知郡幸挹天香偶為地主招邀先輩未忘三
五少年時風厲後來看取一科新進士柳色共宮袍綠
重蓮燈與舞袖紅酣雪兒詞妙絳都春雲母屏留仙客
醉敢陳羌句聊侑綺談

禮樂當年魯兩生

一經科目共春城

數回地脉中興相

文動天家正奏名

詔墨泥香題處濕

思袍草色坐中明

莫嫌老守哀遲甚

曾向慈恩頂上行

建府戊午鹿鳴宴

葉西澗

伏以侯邦貢士共登天府之賢書二席燕賓喜遇春官
之座主秩初筵之俎豆侈盛事於衣冠恭惟諸省元先
輩經富總龜賦工校獵淵源問學腹載考亭之書藻火
文章神授山房之筆踏槐花而程藝穿楊葉以奏功螯
弧先登一人當百鶚書中雋八十加三合計開學館之

英羣胄子宗枝之秀衆科盛矣一舉哀然宮使知院大
資大參相公天下達尊國中元老進為伊呂功社稷澤
生民退友松喬身江湖心魏闕四海覘其出處九重想
其遄歸平地神仙聊作紫微之引領翹材人物終期黃
閣之轉鈞觀使判府侍郎有邊固才傳朱李學平岩領
嘯不妨飲山綠以哦詩禁闥子環行見佩水蒼而入侍
判府工部郎中受齋賢子省戶望郎諫笏猶存上記名
臣之風烈深衣獨樂士知前輩之典刑觀使提舉告院

郎中才美碩膚襟懷光睿虎符龍節所至有良吏之聲
宮錦漁蓑非晚歸侍臣之列判府武傳郎中九秋直幹
千頃澄波舟薄蓬萊平上玉溪之月騎喧竹馬催頒壺
嶠之春常薄郎中松節高寒棣華競爽訪麻源之三谷
聊復拂衣橫野渡之孤舟正須作楫秘閣郎中北手梧
竹東序鍾鏞公休侍溫國之旁從容洛社晦叔社呂蒙
之美大小申公都運監丞郎中慶歷丞相之家皇華使
臣之節木牛給餉已高諸侯之勛名金馬直廬行踵二

蘇之步武提舉資講郎中諸儒北斗一道福星義實仁
聲兼有春生秋肅之氣直言正色宜在朝論夕思之班
判府集撰侍郎筆案從臣詞章岳牧冰壺秋日銘為西
澗之清魁極台符下照東甌之分為諸賢之勸駕食上
佐以禮賓編衣紫綬之相輝藍袖銀袍之交映指沙圓
之佳識送天上之飛翰鼓瑟吹笙此日升歌於華野傳
衣付鉢明年同宴於瓊林輒獻伶歌以鋪吉語

黃堂燕衍盛衣冠

人道魁星照建安

多士權衡推月旦


一番桃李屬春官

升歌鳴鹿陪樽俎

好與溟鵬插羽翰

發策致身須正學

功名久遠要人看



翰苑新書別集卷八